

Wie es so uf m Dorf zu geht

In em Banater Dorf zwischer Modosch un Tschakowa hat de Vettr Kaschper un sei Weib, die BÄsl Amei Gwohnt. Wie die zwei gheirat han, han se nicks ghat wie a altes Haus un ihre Händ, mit deni wu se garweit han. Dass se alli zwei fleißich ware, hat mer jo gsiehn kenne, weil in phaar Johr han sie vun ihrem Haus es Rohrdach runner gworf un han,s mit roti Ziegle nei gedeckt. De Vettr Kaschper hat in seiner Militärzeit in Großwardein bei dr Kavlerie gedient un hat dorte es Riemer un Sattlerhandwerk gelernt. Im Dorf hat dann er aach vor die Baure ihre Gscherr un Zaamzeich, was die Ross im Waa un Pluch bräiche, ausgebessert. Do is immer Geld ins Haus kumm; des hat die BÄsl Amei zumeischt in de Strump getun un uner de Strohsack versteckt. Es hat gar net solang gedauert, han die zwei sich uf m Tschakoware Maak a Ross kauft. Des hat awer viel Naupe ghat, die wu alli net gut ware, drum han sie des Ross ach billicher kriet. Es hat gebiss, un mit de hineri Fieß hat s so gere ausgeschlaa, so dass, wann ener net owacht gin hat im Langschgehn, glei a Stempl vun ;m Hufeisl uf seim Hinnere ghat hat. Stuzich war,s aach noch derzu, hat der Verkeifer gsaat, wie er schun es Geld im Sack ghat hat. De Vettr Kaschper hat awer mit viel Geduld un Freid mit dem Ross gearweit un hat ihm mit dr Zeit alli schlechti Naupe ab gegwehnt ghat. Sie han ne Phauli getaift un sin guti **Freind** gin, De Vettr Kaschper is dann a Enspanner gin, der mit seim Ross sogar Vorspann gfahr is. Er hat sich mit allem befasst, was Geld gebrung hat. Er war mol uf Tschakowa gfahr mit Milone, un hat a zwei Jähriches Rind zum Fleischhacker gfiht vor verkaafe. Wie er dorte in de Hoff gfahr war, un sei Rind am Strick ghal hat un uf den Fleischhacker gwart hat, das der mit dem Hackl dem Rind eni gibt das es fallt, hat er bemerkt, dass der in de Kraut Garte schaut. Noh ment de Vettr Kaschper, „Schlaat ihr dorthin, wuhien ihr Schaut?“ „Na jo, saat der Fleischhacker. „Noh geh ich uf anneri Seit vun dem Rind,“ saat no de Vettr Kaschper, „dass Dir mich net trifft“, So hat er,s aach gmacht. Beim Hemfahre is er iwers Markplatz gfahr for schau, was es noch Neies gibt. Er wollt aach die Milone verkaafe, die er noch im Waa ghat hat. Er hat den Phauli ausgespannt un uf die aneri Seit vun em Waa angebun. Wie er dorte gstan hat, kummt er mit seim alte Freind zamm, mit dem er in Großwardein Ingeruckt war. Sie han iwer Gott un die Welt gered, aach was es so noch Neies ufm Mark gibt. Do schlaat der noh aus Iwermut dem Phauli mit seim Krummestecke iwer die Rippe, des hett er net mache solle! Weil der Phauli hat sich rumgedreht, so gut wie r kenne hat, un hat dem Vettr Kaschper seim Freind es ausgeweshti Hemmet un die halweti Hose vum Leib geriss, so das der bal ganz nakich uf m Markplatz gstan hat, un die Leit sich gut unerhall han. De Vettr Kaschper is no dem Fall mer ganz seltn mit m Phauli unner die Leit gfahr, so dass der Phauli zum Schluss a ganz zahmes Ross gin is. De Vettr Kaschper un die BÄsl

Amei han fleißich weitergarweit, ihre Nachbarn han se oft gfroot, vor wen se dann so viel arweite? weil Kiner han se jo keni ghat. Die Johre sin vergang, die Zeit war schun lang rum, wu se de Phauli verkaaft ghat han. Sie han ach schun die meischti Zeit uf der Gassebank gsitzt un han de Krummestecker in dr Hand rum gedrillt, un die Leit nohgschaut, die was in die Arweit uf de Hottar gang sin. Sie han jetz vun dem gelebt, des was sie sich im ganze Lewe zammgspaart han. Dann is die Zeit kumm, wu de Vetr Kaschper un die Bäsl Amei vun Altersschweche im Bett gelej han un sterweskrank ware. Sie han de Dorfpharrer rufe glosst. Der hat dann ihne es Sterwesakrament ginn un hat se, wie es sich gheert, in ihre letschi Stund getreescht. Die Bäsl Amei, die a bisl besser beim Zeich war, hat noh iwer de Pharre gsaat, dass se noch a Wunsch hett, „Un der wäre?“ hat de Pharre gfroot-. „Wann mir mit zamm sterwe sollte, selle se uns zwei mitzamm in en Todelad ninleje un begrawe“. De Vetr Kaschper hat sich noh mit letschter Kraft ufgsitzt un hat gsaat, „Ne, ne des net. Dorte will ich mei Ruh han.“>

Hans Niedermayer